

ԱՆՎԱՆԻ ԳԻՏՆԱԿԱՆԸ ԵՎ ՔԱՂԱՔԱՑԻՆ

(ՀՍՍՀ ԳԱ ակադեմիկոս Ս. Տ. Երեմյանի ծննդյան 80 ամյակի առթիվ)

Լրացավ ՀՍՍՀ գիտությունների ակադեմիայի ակադեմիկոս, ՀՍՍՀ գիտության վաստակավոր գործիչ, պետական մրցանակի դափնեկիր, պատմական գիտությունների դոկտոր, պրոֆեսոր, ՀՍՍՀ ԳԱ պատմության ինստիտուտի Հայաստանի Հին դարերի պատմության բաժնի վարիչ Սուրեն Տիգրանի Երեմյանի 80 ամյակը:



Ս. Երեմյանը ծնվել է 1908 թ. ապրիլի 10-ին Թբիլիսիում, բանվորի ընտանիքում: Միջնակարգ դպրոցն ավարտելուց հետո 1928 թ. ընդունվել է Երևանի պետական համալսարանի պատմության ֆակուլտետը: Այստեղ Ս. Երեմյանին վիճակվեց աշակերտել Հ. Մանանդյանին, որի ղեկավարությամբ նա գրեց իր առաջին գիտական աշխատանքը՝ Անդրկովկասի առևտրական ուղիների մասին IV դարում՝ ըստ հռոմեական ճանապարհացույց «Պետինգերյան քարտեզի», որը լույս տեսավ 1939 թ. «Вестник древней истории» հանդեսում:

Համալսարանն ավարտելուց հետո Ս. Երեմյանը 1932 թ. Թբիլիսիում ընդունվում է ՍՍՀՄ ԳԱ անդրկովկասյան մասնաճյուղի կովկասագիտական ինստիտուտի ասպիրանտուրան՝ ղեկավար ունենալով ակադեմիկոս Ն. Մադին: Անձնական ծանոթությունը և շփումն անվանի վրացագետների և, առաջին հերթին, Ի. Զավախիշվիլու հետ զգալիորեն նպաստեցին Ս. Երեմյանի կովկասագիտական հակումների ձևավորմանը:

1935 թ. Լենինգրադում Ս. Երեմյանը պաշտպանում է Քարթլիի (Արևելյան Վրաստանի) ֆեոդալական կազմավորումները մարզպանական շրջանում: Թեմայով Բեկնաժուկյան դիսերտացիան: Այստեղ Ս. Երեմյանն ընդունվում է ՍՍՀՄ ԳԱ արևելագիտության ինստիտուտի դոկտորանտուրա, իսկ 1938 թ. դառնում է նույն ինստիտուտի ավագ գիտական աշխատակիցը մինչև 1941 թ., երբ տեղափոխվում է Երևան:

Լենինգրադում աշխատած տարիներին Ս. Երեմյանը «ՍՍՀՄ պատմություն» բազմահատորյակի համար (1939 թ.) գրում է Հայաստանի, Վիրքի, Աղվանքի և Կողքիսի պատմությունը հնագույն շրջանից մինչև IX դ.: Այստեղ լիովին դրսևորվում են Ս. Երեմյանի՝ մարքսիստ-պատմաբանի ունակությունները, ինչպես նաև հմուտ քարտեզագետի ձիրքը:

Ս. Երեմյանի գիտական հետազոտական գործունեության համար որոշակի նշանակություն ունեցավ ծանոթությունն ակադեմիկոս Վ. Ստրովեի հետ, որը խոր ազդեցություն թողեց հայ գիտնականի աշխարհայացքի վրա՝ հին Հայաստանի սոցիալ-տնտեսական պատմությունը շարադրելիս:

1941 թ. Ս. Երեմյանն աշխատանքի է անցնում Արմֆանում ու ապա ՀՍՍՀ նորակազմ գիտությունների ակադեմիայի պատմության ինստիտուտում, որտեղ շուտով դառնում է հին և միջին դարերի պատմության բաժնի վարիչը: Պատմության ինստիտուտում, որտեղ Ս. Երեմյանն աշխատում է առ այսօր, նա ծավալեց գիտական բեղուն գործունեություն, որը պսակվեց պատմագիտական առաջնակարգ նշանակություն ունեցող մի շարք պրոբլեմների առաջադրումով և լուծումով:

Ս. Երեմյանը գիտական բազմազան հետաքրքրությունների տեր մասնագետ է: Զբաղվելով Հայաստանի հնագույն, հին և միջնադարի պատմության ժամանակաշրջաններով, նա խորպես տիրապետեց նրա տարբեր բնագավառների՝ քաղաքական, սոցիալ-տնտեսական, մշակութային

պատմության հարցերին: Այս ամենն ուղեկցվում էր նյութի, աղբյուրների ու փաստերի խոր իմացությամբ:

Ս. Երեմյանի գիտելիքների պաշարն անսահման է թվում, մշակած պրոբլեմների թիվը՝ մեծ, թևակտ, ի վերջո, նրա գիտական գործունեությունն ընթացել է մի քանի հիմնական ուղղություններով: Ս. Երեմյանի գիտական ժառանգության մեջ կարևոր տեղ են զբաղում հատկապես հայ ժողովրդի ծագման պրոբլեմին նվիրված աշխատությունները: 1950-ական թվականների սկզբին հանրապետական (ՀՍՍՀ ԳԱ «Տեղեկագիր», 1951, № 6) և համամիութենական («Вопросы истории», 1952, № 7) գիտական մամուլում նա հանգես եկավ երկու ուղադրվ հոգվածներով՝ նվիրված հայերի էթնոգենեզիսի հարցերին: Սրանք հայ մարքսիստական պատմագիտության մեջ գիտական հասարակայնությանը խիստ հուզող այդ հարցերի շարագրանքի առաջին փորձերն էին: Անշուշտ, խնդիրը հեշտանում էր այն տեսակետից, որ հրապարակի վրա էին Բ. Պիտրովսկու և Գ. Ղափանցյանի հանրահայտ մեծագործությունները՝ մեկը Արմեն երկրի, մյուսը Հայաստան-Ազգի մասին: Սակայն դեռևս զգացվում էր կապակցված պատկերի պակասը և իր այս առաջին հոգվածներում Ս. Երեմյանը լրացրեց այս բացը: Ապա հաջորդեցին նոր հոգվածներ Արմեն-Շուպրիտ երկրի և հայ ժողովրդի կազմավորման ընթացքի մասին, որոնք զգալիորեն ընդլայնեցին պրոբլեմի շրջանակներն ու հեռանկարները: Արմեն-Շուպրիտի մասին հոգվածը վեր հանեց արմենական հնագույն իշխանության պատմությունը Հայկական լեռնաշխարհում՝ մ. թ. ա. XII դ. սկսած: Հայ ժողովրդի ծագման վերաբերյալ Ս. Երեմյանի կատարած աշխատանքների արդյունքներն ամփոփվեցին 1971 թ. լույս տեսած «Հայ ժողովրդի պատմություն» ակադեմիական հրատարակության առաջին հատորի համապատասխան գլուխներում և ենթագլուխներում: Առանց չափազանցության կարելի է պնդել, որ այդ հատորում Ս. Երեմյանի ներկայացրածը լավագույնն ու ամբողջականն է առայսօր հրապարակի վրա եղած նույն պրոբլեմներին նվիրված աշխատությունների շարքում: Այժմ կարելի է վստահությամբ ասել, որ Ս. Երեմյանը իր աշխատություններով հանդես եկավ այն ժամանակ, երբ հայագիտության մեջ հայ ժողովրդի ծագման պրոբլեմը վիճարկում էին երկու տեսություններ: Առաջին տեսության հողմնակիցները հայ ժողովրդին համարյա կազմավորված վիճակում եկվոր էին համարում, իսկ երկրորդ տեսության կողմնակիցները հայ ժողովրդին ամբողջությամբ համարում էին տեղաբնիկ ցեղերի արգասիք: Այս տեսություններից Ս. Երեմյանը վերցրեց այն, ինչ առավելապես իր հաստատումն է գտնում աղբյուրների մեջ և եկավ այն եզրակացության, որ հայ ժողովուրդը՝ կազմավորվել է տեղում, Հայկական լեռնաշխարհում, և որ հայ ժողովրդի կարևոր բաղադրիչը Հայկական լեռնաշխարհում վաղուց ի վեր բնակվող խորի-ուրարտական ցեղերն են, որոնց մարդաբանական տիպի, մշակույթի և այլ տարրերի ժառանգորդը հայ ժողովուրդն է: Միաժամանակ, Լենինով հայոց լեզվի հնդեվրոպական բնույթից և մի շարք այլ տվյալներից, Ս. Երեմյանը գտնում է, որ հայ ժողովրդի կազմավորման գործում որոշակի գեր են խաղացել նաև հնդեվրոպական ցեղերը, որոնց առկայությունը Հայկական լեռնաշխարհում հաստատվում է հնագույն ժամանակներից:

Գիտական շրջանառության մեջ թարմ տվյալներ գնելու և հին տվյալներին նոր մեկնարանություն տալու ճանապարհով Ս. Երեմյանը նախամիջնադարյան Հայաստանի սոցիալ-տնտեսական հարաբերությունները բնորոշեց որպես ստրկատիրական և բացահայտեց դրանց էությունը բնութագրող մի շարք կարևոր կողմեր: Հայտնի է, որ, մինչև Ս. Երեմյանի աշխատությունների երևան գալը ինչպես սովետական, այնպես և նախասովետական հայ պատմագիտության մեջ իշխում էր այն տեսակետը, որ հին Հայաստանի նախամիջնադարյան ժամանակաշրջանի հասարակարգը ֆեոդալական էր: Ինչպես հայտնի է, այդ տեսակետը պաշտպանել են այնպիսի անվանի գիտնականներ, ինչպիսիք են Ադոնցն ու Հ. Մանանդյանն էին: Այդ տեսակետը վերանայելու համար Ս. Երեմյանից քիչ ջանքեր չպահանջվեցին: Դեռևս 1939 թ. լույս տեսած «ՀՍՍՀ պատմության» համապատասխան բաժիններում, ապա հաջորդող մի շարք հոգվածներում («Հնչյունիստական դարաշրջանի Հայաստանի հասարակարգի հիմնական գծերը»—ՀՍՍՀ ԳԱ «Տեղեկագիր», 1948, № 11, «Ստրկության և ստրկատիրության մասին հին Հայաստանում»—«Вестник Древней Истории», 1950, № 1 և այլն) և առավելապես իր դոկտորական դիսերտացիայում («Հին Հայաստանի ստրկատիրական հասարակարգը»), որը նա պաշտպանեց 1953 թ. Մոսկվայում, Ս. Երեմյանը հանգամանորեն շարադրեց իր փաստարկները:

Ս. Երեմյանի ուսումնասիրությունների տեսադաշտում էին գտնվում հին Հայաստանի արհեստները, առևտուրը, գյուղական համայնքը, քաղաքն ու քաղաքային կյանքը և հատկապես հողային հարաբերությունները: Նա ցույց տվեց, որ Հայաստանի անտիկ դարաշրջանի մասնա-

տիրական տնտեսություններում՝ դաստակերտներում և ազարակներում, քաղաքային և տաճարային տնտեսություններում կիրառություն էր գտնում ստրկական աշխատանքը: Միևնույն ժամանակ Ս. Երեմյանն ուսումնասիրել է հին հայկական ստրկատիրական հասարակարգի առանձնահատկությունները, որոնցից ամենաէականը դրսևորվել է գյուղական համայնքի և երկրի սոցիալ-տնտեսական կյանքում դրա խաղացած մեծ գերի մեջ: Այս նոր տեսակետները, որոնք միանգամայն համահունչն էին սովետական պատմագիտության մեջ ղեկավար 1930-ական թվերից սկսած համահունչն էին սովետական պատմագիտության մեջ, բայց Հայաստանի հին հասարակարգի հարցերը մշակելիս անմիջականորեն շարունակեցին Ս. Երեմյանի առաջ քաշած տեսակետները: Նրանց աշխատություններում հին Հայաստանի հասարակարգի ուսումնասիրությունը հասավ բարձունքների, որոնք հազիվ տեսանելի էին 1930—40-ական թվերի սահմանագծից, կրթ. Ս. Երեմյանը ձեռնամուխ էր լինում վերահիշյալ պրոբլեմի մշակմանը:

Այնուամենայնիվ, թեև հայագիտական միջավայրում «երեմյանյական» լուծումը կարծես ուսարկությունների տեղիք չի տալիս, սակայն կարող է տարբեր առիթներով վիճարկվել: Այսպես, Գ. Մելիքիշվիլին՝ հին Արևելքի և հին Վերքի հասարակությունները, իսկ Ա. Նովոսելցեը՝ հին Անդրկովկասի և հին Հայաստանի հասարակությունները, բնութագրում են տարբեր ձևով, քան Ս. Երեմյանը՝ դրանց մեջ տեսնելով ինչ-որ նախաֆեոդալական կազմավորումներ: Միևնույն ժամանակ չի կարելի անտեսել այն իրողությունը, որ հին Հայաստանի քաղաքների հնագիտական ուսումնասիրության արդյունքների համադրումը հելլենիստական, ստրկատիրական Արևելքի քաղաքների վերաբերյալ գիտական տվյալների հետ, թույլ է տալիս խոսել հին հայկական քաղաքների, գոնե մի քանիսի, ստրկատիրական կենտրոններ լինելու մասին, հանգամանք, որը չի կարող լրացուցիչ կերպով չհաստատել Ս. Երեմյանի և իր դպրոցի կողմից հին հայկական հասարակարգին տված ընդհանուր գնահատականը:

Հնագույն և հին Հայաստանի պատմության ասպարեզում Ս. Երեմյանի արածը թվարկելիս չենք կարող անտեսել հայ ժողովրդի ծագման և հին Հայաստանի հասարակարգի պրոբլեմների սահմանագծում ուղղված լող այնպիսի կարևոր պրոբլեմի մշակումը, ինչպիսին հին հայկական գիտական կազմավորումների առաջացումն է, նույն սահմանագծում ձևավորվող հայկական թագավորական հնագույն տոհմի՝ Երվանդունիների կամ վաղկատուն ցեղերի՝ կիմերների և սկյուրների, դեպի Հայկական լեռնաշխարհ կատարած արշավանքների հետ կապված հարցերի լուսարանումը:

Որպես խոշոր միջնադարագետ, Ս. Երեմյանը մասնագիտորեն զբաղվել է հայկական ֆեոդալիզմի պատմությամբ: Ունենալով այնպիսի ականավոր նախորդներ, ինչպիսիք են Ազոնցն ու Հ. Մանանդյանն էին, Ս. Երեմյանը զգալիորեն առաջ մղեց հայկական ավատատիրության հարցերի մշակումը, առանձնացնելով դրանցից հիմնական նշանակություն ունեցող երկուսը՝ ֆեոդալիզմի ծագումը Հայաստանում և ֆեոդալիզմի դարաշրջանի պարբերացումը: Ստրկատիրական հասարակարգի ուսումնասիրությունը Ս. Երեմյանին բերեց այն համոզման, որ Հայաստանում ֆեոդալիզմի տարրերը հանդես են եկել մ. թ. I դ. և որ մ. թ. III—IV դդ. ֆեոդալական հարաբերություններն արդեն ձևավորված էին: Ըստ Ս. Երեմյանի հայկական ֆեոդալիզմը ստորաբաժանվում է վաղ (III—VII դդ.), զարգացած (IX—XIII դդ.) և անկման (XIV—XVIII դդ.) ժամանակահատվածների: Այս պարբերացումն ընդհանուր ճանաչում գտավ ոչ միայն պատմաբանների շրջանում, Հայաստանի միջնադարյան նյութական մշակույթի պարբերացման հիմքում, որն առաջարկել են հայ հնագետները, նույնպես ընկած են Ս. Երեմյանի վերահիշյալ սահմանադրումները:

Միջնադարի սոցիալ-տնտեսական կյանքից բացի Ս. Երեմյանին հետաքրքրել են քաղաքական պատմությունը, մշակույթը, նշանակալից է նրա ներդրումը Ջաքարյան Հայաստանի պատմությունն ուսումնասիրելու բնագավառում: Այստեղ ևս երևան եկան Ս. Երեմյանի կովկասագիտական փայլուն գիտելիքները, հատկապես արտաքին թշնամիների դեմ հայ-վրացական համատեղ պայքարը վերարտադրելիս:

Կա ևս մի ընդարձակ բնագավառ, որտեղ Ս. Երեմյան-հետազոտողի տաղանդն իր ծաղկումը գտավ: Դա պատմական աշխարհագրությունն ու քարտեզագրությունն է: Ս. Երեմյանի բարտեզներով են հագեցած համամիութենական և հանրապետական նշանակության բազմաթիվ հրատարակություններ՝ ձեռնարկներ, դասագրքեր, կոլեկտիվ աշխատանքներ, բազմաշառքային հրատարակություններ: Ս. Երեմյանը փաստորեն խտացված ձևով պատկերել է տվյալ դարաշրջանի

պատմությունը՝ իր տնտեսական, քաղաքական, վարչական և այլ դրսևորումներով հանդերձ։ Նման աշխատությունների մեջ առանձնահատուկ տեղ է գրավում «Աշխարհացոյցը»։ Ինչպես ցույց է ափել Ս. Երեմյանը՝ «Հայաստան» ըստ Աշխարհացոյց-ի աշխատության մեջ, հայ միջնադարյան գիտական մտքի այս հույակապ հուշարձանը քարտեզների մի նշանակալից ժողովածու է, որը պահպանել է անտիկ շրջանի աշխարհագրության լավագույն ավանդները։

1984 թ. լույս տեսավ «Հայ ժողովրդի պատմության» երկրորդ հատորը, որով լրացավ ակադեմիական բազմահատորյակի հրատարակումը։ Հատորի մի հոծ մասին՝ III—VI դարերին, այդ ժամանակաշրջանի քաղաքական պատմության, սոցիալ-տնտեսական հարաբերությունների, մշակույթի որոշ հարցերին նվիրված էջերը պատկանում են Ս. Երեմյանի գրչին։

Արգասավոր է եղել Ս. Երեմյանի մանկավարժական գործունեությունը, որի սկզբնավորումը կապվում է լենինգրադի հետ։ Այստեղ նա հայ ժողովրդի պատմություն է դասավանդել տեղի համալսարանի պատմության և բանասիրական ֆակուլտետներում։ Հայաստան տեղափոխվելուց հետո Ս. Երեմյանը շարունակեց մանկավարժական աշխատանքը Երևանի պետական համալսարանում, և, Արմյանի անվան հայկական մանկավարժական, Վ. Բրյուսովի անվան ռուսական մանկավարժական ինստիտուտներում, որտեղ դասավանդում էր հայ և վրաց ժողովուրդների պատմություն և Հայաստանի պատմական աշխարհագրություն։

Գիտական և մանկավարժական աշխատանքին զուգահեռ Ս. Երեմյանը զբաղվել է գիտական գեղարվեստական գործունեությամբ։ Երևան տեղափոխվելուց և ՀՍՍՀ գիտությունների ակադեմիայի կազմակերպության հետ առնչվելուց, առ այսօր նա պատմության ինստիտուտի հին և միջին դարերի պատմության միացյալ բաժնի կամ առանձին՝ հին դարերի ու միջին դարերի պատմության բաժինների վարիչն է։ 1953—1959 թթ. Ս. Երեմյանը Հայաստանի գիտությունների ակադեմիայի պատմության ինստիտուտի դիրեկտորն էր, իսկ 1965—1968 թթ. վարել է ՀՍՍՀ ԳԱ հասարակագիտության բաժանմունքի ակադեմիկոս-քարտուղարի պաշտոնը։ Սովետահայ պատմագիտության զարգացման համար հատկապես կարևոր դարձան պատմության ինստիտուտի գործունեության այն տարիները, երբ ինստիտուտը աշխատում էր Ս. Երեմյանի ղեկավարությամբ։ Այդ տարիներին հրատարակվեցին առաջնակարգ մի շարք աշխատություններ և գիտական հիմքերը դրվեցին այնպիսի կարևոր ձեռնարկության, ինչպիսին «Հայ ժողովրդի պատմություն» ակադեմիական ութհատորյակն է։

Սակայն Ս. Երեմյանի ամենամեծ երախտիքն այդ տարիներին երիտասարդ, հեռանկարային կադրերով ինստիտուտը համալրելն էր։ Մասնագիտացող երիտասարդները մշտապես զգացել են Ս. Երեմյանի հոգատարությունն իրենց նկատմամբ, նրա բարյացակամ և ընդառաջող վերաբերմունքը։ Նրանցից շատերն իրենց աշխատանքները շարունակեցին արևելագիտության ու հնագիտության և ազգագրության ինստիտուտներում, Մատենադարանում, պետական լսարանում։

Իր 80 ամյակի առթիվ մի անգամ ևս շնորհավորենք թանկագին հորեկարին և ցանկանանք նրան նորանոր հաջողություններ՝ ի փառս սովետական գիտության։

ԳԵՎՈՐԳ ՏԻՐԱՅՅԱՆ

Պատմական գիտությունների դոկտոր